

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

21

7 3194/4634.85 17

Blank page with faint vertical lines and ghosting of text from the reverse side.

Blank page with a light brown or tan color, showing signs of aging and wear.

吉安府志卷三十七

名宦志 安福 龍泉 萬安 永新 永寧 武勳附

安福縣名宦

漢

劉陵 吳瑒

唐

楊彥伯

宋

林積 附趙師日 黃中庸 李康成 韓邦光 彭龜年

李謙 彭忠泰

元

哈佛大學漢和
圖書館珍藏印

明

王德貞 謝良仲 解子元 熊提領 張集

姜明 潘樞 侯志健 潘景岳 孫鐸

鄺子輔 王昇 王忱 趙敏 何澄

莊典 李如圭 周廷徵 吳景 孫懋

程文德 李一瀚 孫良弼 楊仲金 朱勳

陳惟直 胡濬 王鳴鳳 閔世翔 吳應明

楊廷筠 夏九鼎 陳保泰 李樹敏 高賚明

陳曷虞

國朝

趙世猷 蕭恒 袁時泰 焦榮 張召南

梁學源 趙世功 李克廣 鄧霽 附陳士垓

漢

劉陵為安成縣長先是境內多虎民患之多徙他郡陵至

修政月餘虎皆出境流民復還 明一統志

吳碭為安成縣長孫權使呂岱取長沙碭據縣以拒權遣

魯肅攻圍之碭突出曰碭受命天子為長知有漢而不

知有吳也 通志

按謝志劉陵及吳碭均編入三國吳攷呂岱攻長沙

時漢獻帝尚存且吳碭拒吳云知有漢不知有吳自

不應編入吳紀况安成縣名始於秦後改為安成郡

始屬吳是安成為漢縣尤不應編入三國今特更正

唐

楊彥伯新淦人唐末為安福令多惠政招撫逋亡境內安堵有牛產六犢蓮一莖四房之瑞先是彥伯方七歲應童子科昭宗召試之應對詳雅顧謂左右曰劉晏之徒也製詩賜之

安福志

宋

林積字公濟福建尤溪人慶厯進士由循州判改令安福建學聚徒親為訓督時有張嗣宗者煽妖術惑世積收繫之以聞妖遂息嘉祐元年秋邑大旱率吏民禱雨石屋雨隨至仕終河南轉運使

通志

黃中庸至和元年宰安福久任洞悉邑境利弊治平元年

於邑之七里山築陂瀦瀘水曰寅陂臂發支分溉田萬三千畝歲久陂廢官失其籍大姓專之民失利趙師曰紹興間為丞既徙建廟學復盡搜寅陂古跡修復之是歲適大旱惟陂水所溉田苗不槁王庭珪為作寅陂行併叙其事

新增

按黃中庸邑志無傳趙師日小傳未及修寅陂事今採王庭珪詩序補立合傳籍貫出身俱無攷

李康成元豐初為安福令修學舍集諸生講業時黃庭堅尹泰和作詩寄之有孝慈民父母虎去蝗退飛之句

林志

韓邦光歛人紹興元年為安福令軫民疾苦興利剔弊王庭珪暨太守王洋皆稱其廉

安志

彭龜年清江人淳熙進士為安福丞操持端方多惠政後

為起居舍人論韓侂胄罷職復起寶謨閣學士萬歷府志

李謙贛人淳熙中為安福尉悉心撫字會歲稔勸富民出

粟賑濟獲巨盜辭不受賞周必大稱其廉介薦於朝安福志

志

彭忠泰鄱陽人彭汝礪之後為安福縣丞有惠政邑人德

之遂留家於鐵鞋巷新增

元

王德貞至正間為安福知州治州六年清介不苟視官事

如家事既去邑人贈之詩稱其操守萬歷府志

謝良仲安福州人以薦攝安福州事起於本州輿情難愜

良仲以不貪為寶一意撫循咸稱其善

解子元字貞我吉水人至正間為安福州判賊寇境集兵

保障誓與城為存亡兵敗見執子元罵賊不屈死之所

糾義士羅啟南姜天祐亦力戰死

熊提領南昌人不詳其名至正間為安福幕佐以廉能著

聲清版籍均賦役遏抑胥吏民困以蘇

張集濟南人至正間為安福洋澤總管恬淡無欲廉靜有

守恂恂然儒者以上安福志

明

姜明建寧人吳元年甲辰知安福州修學舍葺解宇規制

一新廉聲大著安福志

潘樞鄱陽人吳元年為安福州判清介絕俗一塵不染時州境初復樞與州守姜明同心撫集庶務畢舉萬歷府志

侯志健建寧人洪武元年戊申知安福州首重儒術興修

學校誘進賢士身先表率由是皆鼓舞向學安福志

潘景岳洪武初為安福州判官兵下安福景岳言於主將

得所掠男女千人分置空舍飼以糜粥俱遣還家一統志

按潘景岳傳舊府志縣志名宦皆失載舊秩官並軼

其名今補

孫鐸字文振天台人洪武四年辛亥任安福縣先是知州

姜明侯志健相繼修學草創未備鐸下車尊禮先聖即

購材鳩工興修增建規制大備

鄺子輔宜章人永樂中任安福知縣廉謹有守子埜任陝

西副使嘗以一葛寄輔輔貽書曰汝掌一方刑名未能

洗冤澤物何故以物污我耶以葛還之

王昇漳州人永樂間知安福重學校敦禮讓為治多惠政

擢評事去漳州志稱其孝友慈惠有古良吏風

王忱河南人永樂間為安福主簿操守狷介時年方冠卓

然樹立遷華亭丞去以上安福志

趙敏寧海人永樂末知安福公正廉明時互訐風盛獄至

累歲不能決敏白上官罷其株連者案牘為清治尚德

化好鬪者重懲之謹厚者優待之民翕然向風卒葬於

邑其子孫遂家焉萬歷府志

按林志云敏知安福縣定民戶高下為科差量地里
遠近約賦稅察料物輕重受納價

何澄四川人正統間知安福廉靜愷悌嘗修築寅陂浚渠
道灌注民田共享其利 安志

莊典揭陽人進士宏治間知安福操履端潔政先大綱事
必手記以次第行之不假吏手義所必行直前無忌士
大夫不敢干以私尤加意學校訓士子以道義邑人祀
之 安志

李如圭湖廣澧州人進士宏治間為安福令鋤暴安良民
之獷悍而猾健者一治以猛由是奸民斂迹先是田賦
之籍漫漶不理貧者苦於虛懸而富連阡陌仍籍畸零

如圭為稱其丁糧升降之民甚聳躍歷官戶部尚書 通志

周廷徵麻城人宏治間署安福教諭方正自持課士所拔
皆雋士新進來見左右謂其無贄廷徵曰相見用贄古
禮也必索贄而見非予志也其行已教人惟以道義相

尚陞御史終副使 安福志

吳景南陵人宏治末知安福縣明敏公廉折獄不喜用鉤
距曰吾自以詐而欲民不詐可乎胥吏日悚息惟恐戾
於法悍民據山洞片紙疏名攝之必立至上官下縣事
有不便於民則堅持之擢金華同知去 安志

孫懋鄞縣人嘉靖間知安福縣治民如家人父子民得輸
其情而訟自息奉身儉薄尤重學校維士風歷任應天

府尹

程文德永康人嘉靖間以編修謫海南典史移知安福民以事至庭諄諄開導修行鄉約選父老之賢者為之長人競自奮創復古書院集博士弟子講學其中尋陞兵部郎中去

李一瀚仙居人嘉靖間知安福平易近人有訐訟者委曲曉譬之得其平乃已自奉菲薄衣食簡畧及治民事則精詳備至吏不得施其技凡所興除迄今便之以上萬曆府志孫良弼京山人嘉靖間為安福丞清廉不苟篤實無偽正士接見必具酒食款之陞知縣去

楊仲金蘄州人嘉靖間為安福教諭事母至孝課士極誠貧而有行者捐俸助之母卒任所仲金哀毀骨立既去諸生評論人物必以仲金為取法

朱勲滁州人嘉靖間為安福訓導學有淵源訓士懇切期以實踐學使重其學品聘主白鹿講席歷任泉州教授陳惟直四川人嘉靖間知安福折獄精明庭無留牘嘗勸富民出粟二萬石有奇置社倉於各鄉邑人稱為良吏

以上安福志

胡濬字原荆無錫人進士隆慶間知安福清約如寒士治民仁恕推獄平允有點盜數為民患廉得其情檄捕得之立寘重典增益社倉歲稔咸受其利民追念建倉之

始輒稱陳胡萬曆府志

王鳴鳳姚安人嘉靖間為安福丞嘗行阡陌勸民修古寅
陂捐俸為倡置常平倉民歡趨之陞知縣去萬歷府志

閔世翺字仲升烏程人進士萬歷間任安福縣性坦率不

設成府會歲饑躬詣賑濟勸率富民出粟又時方丈田

慮邑賦漫漶吏得影射任儒士有學行者主之老吏束

手不為蜚語所動賦賴以清陞南京工部主事去浙江通志

吳應明字以誠歙縣人萬歷丙戌進士知安福葺復古書

院會諸生講學邑三被荒災拊恤捐賑在邑著有教養

錄從先錄荒政要錄既去邑人祀之仕至太常少卿安福志

志

楊廷筠號淇園仁和人進士萬歷間為安福令緩催科均

徭役尤加意學校月課歲試獎進不倦入覲還時苦久

旱廷筠兼程至雨亦隨降父老歡呼稱為仁侯雨安福志

夏九鼎嘉善人進士萬歷間任安福縣一言一動皆密有

疏記撫民如子待士以禮不可干以私時稱為夏鐵耳

通志

陳保泰字自公福建惠安人進士萬歷間知安福初下車

問民疾苦剔蠹弊嚴盜禁吏民安堵造士甄陶不懈擢

廣東道御史安福志

李樹敏揚州人萬歷間為安福丞始至部使者督行田甚

迫樹敏自治食具不煩民一饌會計精覈攝縣事奸民

乘隙結訟敏獨持簡靜有餽送悉却不受邑北境方虎

患敏為文牒城隍神驅虎虎遂斂戢後卒於官貧無以殮百姓醵錢助之安志

高賚明廣東人進士天啟間知安福時魏璫毀天下書院建生祠邑有復古書院皆在毀中賚明曰書院祀王湛鄒諸賢守仁學問事功在天下若水為粵儒宗守益為

安福理學開先毀之何為卒由是得存參安志

陳曷虞字鉉聞湖廣應城人崇禎進士任安福縣清慎明敏平易近人士民愛之陞廣西道御史去邑人立祠祀

焉安福志

按安福名宦危嶽劉廷賓邵夢河三人均係府秩署縣事已見府名宦傳中故不重錄

國朝

趙世猷順天人順治初知安福時罹兵燹人心未定世猷至捐去一切文法與民休息丁亥大饑石米七金多方拯救全活甚眾游兵入境搶掠世猷力戢之通志

蕭恒字月如陝西三原人順治進士任安福縣邑田水衝沙塞多虛糧力請直指題減千餘石通志

袁時泰富平人順治間為安福令時當草創規制未備泰首葺學宮次及安積倉愛民好士政簡刑清遂定治邑

規模安福志

焦榮號荆巖河南新野人順治乙未進士知安福時邑多積盜榮緝訪得之悉寘於法遂無盜患邑舊無志榮以

安福叢錄福乘藏稿兩書捐俸修之尋擢御史去邑人祠焉通志

張召南字仲文朝邑人順治進士知安福西鄙阻遠民抗不供役乃單騎往諭咸感泣輸賦吳逆偽將出江西陷安福召南請制府兵復之時議分滿兵駐安福召南力陳不可後以職事赴會城賊突至城復陷立馳歸集鄉勇臨城賊遁城再復招撫瘡痍馴服頑梗勸諭開墾散給牛種得田二千餘頃內擢未任卒陝西通志

梁學源廣東順德人進士蒞安福甫下車即有文誓隍廟時值大饑多方賑濟又連年虎亂亦以文告隍廟逐之虎患遂息邑積欠累累學源不忍差擾雕木皂以代民

不應竟以此解任著有宦遊賸囊新增

趙世功字山公奉天人康熙間知安福催科不擾聽訟廉明戢豪強安良善利興害除安福志

李克廣字巨公河南柘城人康熙間為安福令慈祥愷悌審丁免派徵省民間公私費後例變民困益頌克廣不安福志

按安福名宦劉廷瑛康熙間由廬陵令署安福已見廬陵名宦不重編

鄧霽萍鄉人康熙丁卯副貢任安福訓導其父嗣禹亦遷吉水霽至孝父子同郡為儒官相距僅一程訓諸生悉以父所教者教之嗣禹研究陳氏易霽更以史証經授

邑諸生未幾以憂去後有教諭陳士垓者亦萍鄉舉人
即先世號陳氏易者也為諸生時與齊相師反講易先
後官安福其教諸生亦如齊尤精制藝與諸生論學先
器識而後文藝諸生以制藝就質悉繩以法度多所成
就請老歸 新增

龍泉縣名宦

南唐

李孟俊

宋

何嗣昌 陸若濟 王 繹 黃大臨 陳秉文
趙迪之 王 徽 李 準 蘇 欽 楊 亮

元

劉昌士 胡敦詩 張大經 夏穎達 范德念
趙 荆 范德勤 黃 肇 趙善稼 景 時
楊太異 郭應祥 李大訓 劉必端 王 濶
何萬選 熊大經 陳 昇 辛 應 何安世

明

彭繼炎 胡可詩 伯顏胡定 劉 鼎

高德賢 張時勉 謝子木 吳 瓌 孫 誠
陳 義 方 玘 高 嵩 姜學夔 歐 禮
翁 溥 張嘉興 陳八元 徐士登 王建和
王揚金 宋運昌 劉汝諤

國朝

薛世瑞 石 曜 趙嗣杵 盧夔龍 趙世麟

黃宏任 王 卓 董希聖

南唐

李孟俊隆興人保太元年以泰和十善鎮為龍泉場命孟

俊知場事時諸鎮爭雄孟俊在鎮內綏外禦百姓安之

龍泉志

宋

何嗣昌字紹宗蘇州人進士明道二年以寺丞出為龍泉

令縣治為舊場地形勢污下城亦卑隘嗣昌乃卜水北

桐木勘築城遷治併創建遂江浮橋修禾蜀鄉梅隰水

利民至今被其澤 通志 縣志 參

陸若濟字邦美金谿人進士皇祐間宰龍泉清介絕俗秩

滿其妻詆之曰君不取一錢行道之人皆談清德今解

官亦載一清舟歸耶若濟曰是非汝所知也人高其操

林志

王繹字誠季宋城人元豐五年任龍泉令培善化悍清訟

獄平賦役重創遂江橋

黃大臨字元明分寧人庭堅兄元豐間由萍鄉徙龍泉令

或諷其過慈大臨曰字民令職也豈其操三尺與百姓

讐敵哉正直自持私謁不入提舉亦折節下之

陳秉文宣和六年知龍泉縣時遂江浮橋圯秉文重新之

邑人名曰陳公橋

趙迪之字順甫政和進士建炎二年知龍泉時羣盜蜂起迪之築廢壘為寨鳩衆入保召募材武之士團結捍禦虔寇邱權奄至相望一水間竟不敢犯後以秩滿去民建生祠祀之

王徽字次猷臨川人紹興四年宰龍泉當羣盜焚掠後徽居僧寺招集流亡興創縣堂吏舍以安民心四野骨骸暴露命僧為叢塚瘞之餘寇蕭和等時出剽掠徽悉招降

李準字平一盱江人紹興八年為龍泉令虔吉諸盜連年剽掠四境倉皇準甫下車即訓練鄉勇守禦賊黨李壽

龍來刳城準力遂之倡議修葺學宮甫及數楹以病去蘇欽字伯承溫陵人紹興間為龍泉令撫字百姓清理庶獄一切興修首先學校士民德之

楊亮紹興間令龍泉耿介明敏事無留滯待人寬恕有良吏風重創遂江浮橋

劉昌士紹興人紹興間為龍泉尉縣胥吏素強橫遇事索金未遂必中以深文昌士廉得其實言於縣窮其奸狀按治無遺

胡敦詩字觀正靖安人進士紹興間知龍泉清介自守興學造士趙汝愚稱之曰持身冰潔不以富貴縈懷真學問中人

張大經字彥文南城人進士紹興末令龍泉訟獄平情催科不擾時江淮軍興凡所須金革羽箭之屬調度有方不以累民衆心感激皆先期以應

夏穎達德興人隆興二年知龍泉歲大饑郡守迎合轉運使意不以災聞穎達因悉取民訴災狀通報卒得賑恤移知清流縣

范德念字伯榮建安人乾道三年為龍泉主簿少從其舅胡安國講學砥行立名在任不卑其官務行其志平訟獄拙催科興修水利邑人並受其惠

趙荆字夢授高涼人乾道五年知龍泉縣下車幕前尹陸若濟德政建師陸堂廉幹明敏懲創奸吏一時豪右斂

跡

范德勤字光仲豐城人淳熙元年知龍泉強幹精密發奸竒中茶寇賴文政犯境官軍進討德勤內給餽餉外圖備禦卒保萬全

黃肇淳熙二年以龍泉主簿攝縣事葺學舍廣學田修大豐陂立倉貯平糶糴既去民謳思之

趙善稼字雲甫臨安人紹熙五年知龍泉精明著聲有盜繫獄善稼鞫之非真以其寃白於州州不以為然後獲真盜始服其明

景時字秀發華亭人慶元三年知龍泉承水沴之餘一意撫循催科不迫修學校建譙樓及縣倉嘗曰吾於政事

無以踰人惟不擾二字終身守之

楊太異字同叔潭州人紹定元年為龍泉尉適山寇剽掠入境太異糾集鄉勇與賊疊戰於東坑零田寇懼而遁邑大疫癘延良醫治藥以濟又置抵當庫貯公費有事夫役不擾而辦

郭應祥字永禧臨江人嘉定四年為龍泉令葺學宮創號舍選邑之俊秀肄業其中置田佐膳資邑之有學田始此折獄明決案無留牘

李大訓字君序廬州人嘉定間宰龍泉寇患甫平民多失所大訓力蘇窮困寧人息事囹圄一空

劉必端字友直建寧人嘉定八年為龍泉令創社倉置貢士莊請免學田租稅士民竝受其惠

王灤字伯山衡州人淳祐元年令龍泉時城多圯久未繕治灤修築之併濬深濠池事訖而民不勞

何萬選字子淵長沙人淳祐間知龍泉清廉惠民修大豐陂以興水利賦稅聽民自納無追呼之擾

熊大經字仲常豐城人寶祐間知龍泉廉明慈惠常單騎巡行阡陌詢民疾苦以誠感人徭役百姓應期而集後擢去民號泣罷市數日

陳昇字東升福州人開慶元年知龍泉建大成殿增學田南寇犯境督民力戰於新林又捷於禾源自是寇不敢犯

辛應字子定饒州人景定間令龍泉清介持躬勵精圖治
凡事有始終無或稍弛後經丞相文天祥跋其行狀
何安世字景仁聞州人咸淳二年為龍泉令勤於吏事秋
江水泛漲壞民居多溺死安世力請於郡減苗租以優
上戶諭上戶減田租以恤貧民

以上龍泉志

元

彭繼炎龍泉人至元間以平寇功陞本縣尹歸附之初民
心未固徵糧輸役率族人先之故民不戚而從卒祀名
宦子雲龍以廕補武林主簿

胡可詩字詩庭廬陵人胡銓五世孫延祐二年為龍泉教
諭邑有學田久為天寶桑林兩寺豪僧所踞可詩倡議

清復適知縣伯顏主簿胡浣並加意學校按籍清復歲
收其租養士

按教諭胡可詩在延祐二年知縣伯顏主簿胡浣在
延祐三年三人事實皆專清復學田今合併為一傳

劉鼎字子鉉廬陵人至正四年任龍泉教諭課士有方師
範嚴肅多士共相矜式

以上龍泉志

明

高德賢字起巖汝寧人明初知龍泉兵後歲饑募富民出
粟設東西二坊賑活數千人新公廨修學舍增廣生徒
身訓督之

通志

張時勉字天祿山東人洪武初為龍泉主簿招集流散撫

綏得所修葺文廟培植儒林為明初賢佐龍泉志

按龍泉秩官志作張時敏

謝子木溫州人洪武間令龍泉虔寇蟠結每來寇境子木

集眾勦滅民獲安寧均賦役勸稼穡縣以大裕通志

吳瓌侯官人洪武末知龍泉振興學校勸課農桑視民疾

苦如身家事

孫誠太平人永樂初令龍泉為政知大體首修學校橋梁

圯者皆修復之募民開墾地利士民並沐其休

陳義宜寶人宣德八年知龍泉以廉潔稱民有饋魚者斥

不受曰受一魚將所受者不僅魚矣楊士奇大書廉明

二字嘉之參通志

方玘字體行莆田人貢士景泰元年為龍泉教諭謹厚端

重不妄言笑研求正學嘗教學者潛心通書曰聖賢門

戶盡在於此著有易經解疑

高嵩廣西人進士宏治間為龍泉教諭講學以明理致知

為務諸生不務實學專事科舉者必痛切言之歷官太

僕寺卿

姜學夔字一臣嘉興人進士成化間知龍泉清約如寒士

治民多平恕有訐訟者善言委曲曉譬之一蔬取諸市

必平價值以官價二字為官蠹

龍泉志云姜學夔現祀名宦舊志闕傳今採梁氏類

編補之

歐禮郴州人貢士嘉靖間令龍泉悉心民間利弊凡所興
除率多惠政時濟川橋久廢民艱於涉禮捐俸倡建
翁溥字德洪諸暨人進士嘉靖初以吏科給事中謫龍泉
縣丞修大豐新豐二陂興學校集邑之俊士講學嘗攝
廬陵縣多善政累官江西巡撫

張嘉興臨桂人貢士萬厯初知龍泉廉介公正猾吏屏跡
豪惡潛踪凡利害之切於民者毅然任之卒於官

陳八元長壽人貢生萬厯間知龍泉勤敏精慎嚴約吏胥
催科不擾訟獄平情時有吏書不上堂皂快不下鄉之
謠

徐士登字德懋豐城人貢士萬厯間為龍泉教諭崇尚躬
修耻言利祿倡修文廟櫺星門郡守重其學品聘主白
鷺書院教事晉接諸生禮讓必謹立學規絕干謁士夫
翕然慕之

王建和號乾純海鹽人進士萬厯末知龍泉興修學校簡
拔英俊就各都里立鄉約邑漕糧征解累民改為官征
官解又定為糧差合徵之法積弊盡除邑人蔡文詔傳
其事

王楊金字貴南貴池人貢生天啟初令龍泉發奸摘伏胥
吏畏之如神性至孝每蒞事出入必冠帶告母為政一
心愛民既去民建亭立石記之

宋運昌江南人進士崇禎初知龍泉粵賊將趨龍泉運昌

巧設方畧繕城濬濠集鄉勇數百人教以戰守之方且
逆探賊所從入之路斬木削石以塞之又嚴守於山之
四隧隧各置戍百人賊不敢至一邑獲全

劉汝諤號五熏吳縣人貢士崇禎間知龍泉民素苦錢糧
為戶書增損諤至完欠出入悉歸內署戶書不敢為奸
遇事立斷訟師蠹役盡法究治五載政治一清

以上龍泉志

國朝

薛世瑞字執躬范縣人順治初授龍泉令時吉安初破不
軌之徒多竄身營伍肆掠環城十餘里燒燬殆盡世瑞
日往來諸營民被掠者輒救出之力請緩徵以甦民困
戊子寇變後又值大饑世瑞亦至夜乃一食其清操愛

民如此

安志

按薛世瑞龍泉志無傳今查安志增補

石曜字麗躔永年人進士順治戊戌知龍泉政尚簡靜與
民休息兵燹後田畝無稽曜開局清釐冊籍令士民自
相磨對吏胥不能施其技學宮倡議重葺規制一新並
修浮橋民資利涉

趙嗣抃字又獻大嵩衛人貢士康熙間兩任龍泉令前後
治邑十五年恤民艱苦振興庠序運軍攀累民戶抃為
條辦杜其害捐俸重葺學宮修浮橋建固橋菴重新五
峯書院置義學田租資師生束脩膏火自乙卯兵燹後
造就人才撫綏百姓厥功甚偉

盧夔龍字雲翼瀘溪人歲貢康熙間為龍泉教諭時值寇賊剽掠學宮圯廢夔龍捐俸倡修殿廡齋舍煥然改觀集多士講求經義諸生有為賊羈留而歸者夔龍察其無他力白於學使得昭雪完名

趙世麟字振公奉天鑲紅旗人康熙間知龍泉嚴正清介奸蠹斂跡苞苴悉絕甲申歲饑邑中儲積匱乏郡城米價騰貴世麟招商領資赴省告糴得米聯檣官役阻運世麟星夜馳詣撫軍乞假令督米民慶更生

黃宏任仁和人康熙間知龍泉慈和坦易不事刑威待士以禮寒畯多荷裁成農田水利如虎潭大豐等陂塘皆身親督濬之

王卓字立齋蒲城人貢士雍正五年知龍泉邑吏胥工壅蔽卓至廉得數渠猾立寘之法時上官檄下查墾輸盈卓跋涉山澗憫民艱苦以無可增益報軍丁王郭朋多攀累民戶卓稽前尹趙嗣抃成案辨駁益堅在任五年以清廉著聲

董希聖字思齊紹興人雍正六年任龍泉北鄉巡檢博雅好古購書盈榻不近時趨公暇每作詩輒百韻臨事有才識誠能感人北鄉武陵壠峭巖欹徑下臨深淵行者心怖希聖出俸錢為倡伐石開廣逾年遂成坦途隣邑安福之西鄉積歲多逋賦官役束手上官廉其能檄往使輸希聖開誠諭義不一月積逋一清

以上龍泉志

萬安縣名宦

宋

許 澹 李唐傑 趙成之 張澹古 邵時卿

張允升 吳從固 黃 東 趙師道 鮑粹然

黃 炳

明

張嗣先 馮 勝 趙彥剛 萬鵬舉 劉 燦

唐 渠 黃 須 杜 愷 陶 俊 張敬禮

袁士鳳 黃 宏 周 衝 桑 翹 王 冕

劉 坤 王 吉 王慎德 譚希思 申芝芳

梁于涖

國朝

史象晉 李 延 李如湧 胡 樞 譚忠義

馬之驛 黃圖昌

宋

許淡熙寧間知萬安時縣境新建澹畫疆界創公署建學

校扼姦戢欺釐革諸弊郭師元據其實作許公十政詩

刻石以傳參明一統志

按自許淡以下十二傳查秩官表里居並失載

李唐傑建炎間令萬安時金兵歲犯江浙羣盜蜂起傑倡

義募勇士積糧糗設土軍維舟截江巡行捍禦戒令嚴

肅賊不敢犯通志

按通志作唐傑萬安志秩官及宦績皆稱李唐傑今仍縣志

趙成之紹興初任萬安縣時寇盜未靖游兵四出成之築城浚池立門設禁以為防禦治近大江渡船敝壞成之創新之民不病涉省刑禁備荒穀惠民之政次第興舉邑中大治

張澹古紹興中為萬安令修治學校振興儒林性廉介故自以澹古名居恒常以受金速謗為戒

邵時卿紹興中知萬安有山寇壓境時卿作檄解之寇曰此令誠長者引兵去時有語曰邵公一檄弭盜神策威不在兵勝惟於德

張允升紹興間任萬安知縣寬大為政守正不阿嘗曰殺人以媚人刑人以利己我不忍為也

吳從固乾道中令萬安民有訟者從固反復勸諭之民至感泣不願終訟

黃東慶元初任萬安縣除苛政省嚴刑教人懇摯視民猶子不踰年人多感化

趙師道慶元四年知萬安崇尚文教以禮讓為本常語民曰刑以止暴不得已而用之子甚不忍吾民受刑也舊學在縣東極卑陋改遷於雲岡夫子廟址合廟學於一建明倫堂集諸生講學其中治邑十年慈祥愷悌稱循吏

鮑粹然嘉定元年令萬安勤恤民隱飲人以醇邑人稱粹然治邑不愧其名

以上萬安志

黃炳嘉熙間為萬安令會峒丁反炳鳩兵守備忽五更報寇至炳遣兵迎敵衆曰枵腹奈何炳曰第速行飯至矣乃率吏沿市呼曰知縣買飯時晨炊方熟厚予其直於是兵飽食一鼓破賊尋以功擢知撫州

萬應府志

明

張嗣先吳元年為萬安令時縣境分據民志靡定嗣先悉心撫恤招集保聚課農桑重禮義四境安堵

萬安志

馮勝字仲文淮西人洪武初知萬安剛明果斷時龍泉盜彭舉黨聚險要命勝率贛軍捕治之又招諭殘民開墾

田野建學造士凡祀神壇壝以次飭治一新

林志

趙彥剛福建人洪武間知萬安縣廉靜簡約興學勸農均賦役革吏蠹民訟盈庭立剖決之邑西南寇起親征撫諭迄不為患民賴以安去任惟兩敝篋而已

通志

萬鵬舉鎮江人洪武間為萬安縣丞廉平勤敏有豪民劉仲賢殺鄒君瑞父子五人匿其屍鄒媪執牒訴諸縣以無屍証弗錄鵬舉察其冤錄之俄有五蜂聚案如有訴復導往劉舍飛集竹坡劓之四屍如生惟失一孩童屍蜂復環繞導至榆木下發土得之首猶可識乃具獄斬

劉於市

豫章書

劉燦浙江人洪武間為萬安丞攝縣事翦滌民瘼有勾攝

以一木牌疏其名無不至者曲直得情獄無冤民林

唐棐字伯忱永豐人洪武中任萬安訓導淡泊寡營訓迪

諸生凡寒士來學者每資助之多所成就後召入翰林

黃須字用之福州人永樂中任萬安教諭尚廉耻善誘掖

講學宗朱子必反求於己不以記誦為功士風翕然不

變創先賢祠表章正學接引後進

杜愷字彥和武邑人宣德間知萬安為政簡易以德化人

學宮建樂育堂集諸生講貫治邑二年輿情帖服

陶俊柳城人景泰二年任萬安丞以文學起家識見奇特

民訟舉筆斷之如神邑人稱為陶公判

張敬禮定海人景泰三年任萬安典史刑法無枉有盜牛

者訟數年不決敬禮以理解之盜者愧服以上萬安志

袁士鳳東莞人成化間知萬安廉介有為廢興墜舉繕治

學宮重修譙樓旌善亭南門橋邑有劇盜立捕寘之法

奸民相戒自戢以治行內召尋卒於南京萬歷府志

黃宏字德裕六合人宏治間為萬安令時虛糧累民宏措

置盡得豁除蠹役舞法察實盡法以治更獎許士類勉

以砥廉隅擢戶部主事累官至叅議

周衝字道通宜興人宏治中任萬安訓導持身清介課士

首嚴義利之辨獎勸後進成就甚多遷應城令去

桑翹常熟人正德間為萬安令時寇賊橫掠城圯未葺民

思遷徙翹至撫綏有方度地形勢廣築七百餘文學宮

久被火翹建復之復置社學以教邑之俊秀山川社稷各壇及公廨橋梁無不以次修舉

以上萬安志

王冕字服周洛陽人正德十二年進士除萬安知縣宸濠反長吏多奔竄冕募勇壯得死士數千人從王守仁攻復南昌宸濠解安慶圍還救至鄱陽湖兩軍相拒濠盡金帛犒死士殊死戰官兵不利冕密白守仁以小艇實葦於中擬建昌人語就賊艦乘風舉火濠兵大驚遂潰敗焚溺死者無算濠易舟挾官人遁冕部卒棹漁舟追執之宸濠平守仁封新建伯而冕未及叙坐他事落職世宗踐阼錄前功擢兵部主事後巡視山海關死節

史忠義本傳

明摘

劉坤壽張人嘉靖初為萬安令潔已愛民不設鈎距民以訟至庭必教以孝悌睦婣之行令所親諭解而後讞理自奉甚儉約革履布袍乘羸馬出入阡陌每飯侑以蹲鴟宰數日一肉食時有官瘦民肥之謠

萬安府志

王吉錢塘人嘉靖間任萬安縣丞適臺使者過縣苛擾無狀縣令震懼不前吉往謁臺使抗言曰邑令雖卑不可以非禮加使者憚其氣壯唯謝而去

王慎德嘉善人進士萬歷間為萬安令守身廉潔屏絕賂遺以寬恤下不矜明察每曰法峻則民畏法當則民愛與其為民畏不如為民愛也上官稱為賢令

譚希思長沙人萬歷間知萬安崇尚文教優禮師儒尤加

意寒士置田贍學先是嘉靖間知縣劉繼文歲捐膏火至是始有學田

申芝芳號素公蘇州人進士知萬安為政持大體愛民禮士如不及連歲饑荒芳施糜粥於四門遠邇皆來就食崇尚文學尤振拔孤寒治邑九年士民建祠以祀

以上萬安志

梁于涖字飲光揚州人進士崇禎間知萬安慷慨持大節縣當控總兵馬絡繹措置有方山寇圍城登陴誓守城壞整衣冠拜畢投水死

安志

按萬安志云梁于涖以守城就縛繫獄數月不屈日吟咏詩文自狀生平絕粒而死

國朝

史象晉號畫塾上元人順治進士知萬安時戊子寇亂後城郭荒蕪邑無居民晉悉力撫字民乃稍集適山寇竊發力為防禦離散之民於是復聚

李延河南人順治辛卯知萬安廉靜明決時大兵過境差事絡繹延疲於夫役署聯於門云有客頻呼馬無人問喘牛

李如滂號澹菴高陽人順治進士辛丑知萬安邑民逋欠多為奸胥中飽滂洞悉其弊丈田審丁盡加釐正所遺虛糧悉開除時邑無吏舍吏僦民居滂捐俸建之以誑誤去士民建祠以祀

胡樞號邕藩石門人進士康熙二年知萬安為治以敦本善俗興利除害為已任增修文廟繕治城郭及社稷山川各壇壝興復龍溪書院各社學平徭役清戶賦治津渡葺橋梁纂輯邑志嘗以公事詣郡城與守道施閏章講學於青原山

譚忠義黃陂人進士康熙癸丑知萬安清廉儉樸勵精庶政嘗自署一聯云儉以養廉勤能補拙邑人稱為實錄馬之驛號飛穆奉天正藍旗人監生康熙戊午知萬安時邑道士寇城池初復之驛悉心拊循惟恐或傷肅清奸弊藪墾荒畝興修廢墜會滿漢大兵過境雲屯城中之驛應給軍需無誤遇悍卒擾民單騎往戢斂手畏避

治邑九年以報最擢知穎州 以上萬安志

黃圖昌號淑岱大名人進士康熙丙寅知萬安興教化廢墜圖昌毅然任之繕治城垣重修學宮創崇聖祠復龍溪書院易額濂溪學校振興絃誦之聲遍城邑蒞治五年政績與胡樞相配 據各記增 永新縣名宦

吳 陳省躬

唐 賀 憑

南唐

李元清

宋

董衢 張岐 史應用 元絳 侯彭老

孫億 郭奉世 王輝 周穎 趙不憊

牛宏 張象先 施興祖 尹躬 王師道

周嗣武 邵朴 黃希 柴必勝 丁南金

張繼阮 范應鈴 張洽 陳滌 梅杞

劉炎

元

完顏疇 張奇 陳質 李春 趙大訥

陳汴 曹裕 諭立

明

田盛 烏斯道 於仲寬 賀守約 鄧經

陳元韜 施得中 徐輔 薛驥 李愷

馬崑 曹謙 梅春 宋佳 謝表

柯相 胡偉 陸粲 沈珠 趙錫

陶益 龔錫爵 余懋衡 陳三謨 薛敷教

陳三省 陳圭 周夢尹 沈維堡 管正傳

閔及申 黃受封

國朝

黎士宏 盧傳 何屬乾 張士琦 張遇

黃述灝 史榮 蔡學灝 徐可是 朱懔棧

陸調元 黎芝

三國吳

陳省躬字不疚南城人射策拜永新令明察有斷民訟曲
直立分時柅衡盜入境殺傷防戍兵遺尸遍野省躬出
府緝市棺瘞之郡符下縣責其擅專省躬判郡符云開
官庫使官緝買棺木葬官軍何過之有 通志

按林志及謝志均列陳省躬名於南唐永新志歷編
其名於三國攷三國志及南唐書皆無省躬名永新
志編入三國由來已久今仍之

賀憑字中心會稽人會昌四年以著作郎任永新令有惠

政秩滿當去邑民遮留之因家焉 通志

南唐

李元清字如水濠州人開寶中以永新縣與湖南接境因
改永新為制置以元清為制置使元清趨捷善走每數
託病微服入湖南偵敵動息輒先知之故永新邊境無
擾先是夏賦準貢見緡民苦之元清奏請納帛一疋折
錢一千以為定制民便之嘗減冗費十萬餘漕運入金
陵以濟國用 馬令南唐書
按通志云明一統志李元清作楊元清

宋

董衢字獨步酸棗人乾德間宰永新以廉平著聲善類多

所汲引任滿百姓遮道留之不得行遷殿中丞林志

張岐字鳳山建陽人明道間知永新治獄明允吏不敢欺

民有積逋岐代補輸之通志

史應用字體之萊蕪人咸平中為永新令始至治政條目

措置咸宜前宰能得民應用不改其政一邑肅然志永新

元絳字厚之錢塘人舉進士攝上元令有聲安撫使范仲

淹表其才知永新有豪民子龍聿誘少年周整飲博以

技勝之計其貲折取上腴田立券久而整母知之訟於

縣縣索券為証則母手印存弗受又訟於州於使者擊

登聞鼓皆不得直絳至母又來訴絳視券呼謂聿曰券

年月居印上是必爾得整母他牘尾印而撰偽券續之

耳聿駭謝即日歸整田叅宋史

按元絳舊府志永新志皆作河南人宋史通志並作

錢塘人攷元絳本姓危先世為江西南城人絳曾祖

危仔倡始居錢塘錢鏐王惡其姓不吉易姓元代居

錢塘非河南也今據宋史更正

侯彭老字思孺衡山人至和初知永新治邑數年政績彰

聞召入為刑部郎中志永新

孫億字延齡分宜人進士知永新縣釐剔奸弊不異強禦

民歲市縑六萬餘疋主外計者收帑錢以償他費給鹽

以償縑直億發其奸給以帑錢吉租歲收四十萬斛漕

臣意在厚斂戒庾吏定收十二以克羨餘億拒臺命守

州約出納一用倉式徙知白州卒余靖為誌墓袁州志本通志

按孫億永新職官志失載其名令永新年歲無考然

余靖同時則慶歷元豐間人也傳文與通志相仿今

依通志吉水志因吉州二字誤載刪彼歸此

郭奉世字少馮新淦人大觀間為永新令時泰和民苦其

令請諸上司願得奉世治其邑漕帥檄奉世往永新民

不可奉世乃寓兩縣之界兼治之明一統志

王輝字近光青州人靖康初以義兵立奇功授永新粟傳

寨巡檢秩滿僑寓吉州淳熙二年茶陵寇犯永新州守

以輝驍勇檄禦之輝身先奮擊戰不利為寇所得寇欲

輝降輝憤罵死之贈吉州刺史邑人立廟秋陂祀之

周穎字悟士建炎初為永新令惠愛浹民庭無稽訟紹興

初召為吏部員外郎

按周穎以下里居舊傳及秩官多失載

趙不愆字無咎紹興四年知永新邑經兵亂城市為墟不

愆修學廟建縣署百廢咸舉任滿去民乞留諸司以聞

詔再任累官至禮部郎中

牛宏字不羣紹興人進士授永新令廉以律已惠以裕民

尤崇尚文教振作庠序秩滿遷秘書丞以上永新志

張象先字紹祖浚儀人紹興間知永新奏行經界法恪謹

不懈永新賦有定制皆象先之力林志

施興祖字克紹烏程人紹興間為永新縣丞廉介能感人

時禾山宿寇數百人嘯聚鄉城震駭興祖單騎往諭寇感其言皆散去在官不妄受一錢嘗曰居官除俸祿此外皆贓也予不願以得贓賈禍

尹躬字高老紹興間為本縣主簿

事詳庶官

王師道字自得兗州人紹興間任永新粟傅寨巡檢沉勇敢戰遇盜於吳村射斃其首追奔數里遇伏力戰而死周嗣武字功父浦城人乾道初令永新時邑豪姓與蠹吏交通舞法縣令每為所挾制嗣武懲蠹弊盡法治之豪姓懾服歲饑有羣盜嘯聚謀劫邑嗣武白郡急請兵為備下令勸富民賑粟平糶民各安堵盜亦徙去

邵朴字古民晉州人乾道八年知永新持已廉謹折獄精

明無私謁無留牘

黃希字夢得臨川人淳熙初令永新適山寇毒擾後人民散徙希至撫恤備至靜以鎮之建春風堂日吟咏其間示以無事人復故居政教大行

柴必勝錢塘人淳熙間知永新文教振興政績彰聞邑人咸頌其德

丁南金字世用吳人紹熙元年任永新主簿佐政勤慎工於詩公餘惟吟咏自娛外事一無營求與知縣柴必勝並著聲一時

張繼阮字不狂清河人慶元間任永新尉時盜興訟繁阮習法精吏事分別末減囹圄為之一空性廉儉絕私交

甘淡泊歷四考其操不渝

范應鈴字振之開禧初任永新尉時縣寇甫平喜亂者紛相驚擾應鈴廉得其主名嚴治之遂平寇亂以上永新志

張洽字元德清江人進士嘉定間知永新一日謁告聞獄

中榜笞聲蓋獄吏受財訊囚使誣服也洽大怒亟執付

獄明日上於郡黜之湖南鄴寇作亂與縣接壤洽單車

以往邑佐與寓士交諫弗聽至則寇未嘗至乃延見先

導而犒之因行安福境上結約土豪鄴寇聞風不敢窺

伺未幾南安舒寇將犯境知有備亦引兵去宋史

按宋史載張洽為臨江之清江人少穎異從朱子學

自六經傳註而下皆究其指歸朱子嘉其篤志與黃

幹並稱高弟永新志本末未詳誤作崑山人今攷宋

史更正

陳滌字洗心零陵人紹定四年知永新秉性剛直聽訟明

決人服其公嘗曰胸中空洞則事易辦論者以為名言

永新志

梅杞字一清嘉熙二年令永新邑初為土城歲久傾頽杞

曰城衛民無城曷以衛捐俸倡輸改築石城永新志

按又尚集作梅玘

劉炎字思漢少負詞學淳祐間為永新尉拙於逢迎專一

愛民不稍枉法適州守某有貪名行部至縣覬覦之炎

不悟既行以詩諷炎云未到桃源來長憶出家景及到

言安府志 卷三十一
桃源了還是鑑中影卒未迎合守意守銜之被誣罷去

永新志參
豫章書

元

完顏壽字壽恭至元五年知永新州下車首恤民瘼察吏弊剔蠹寧人期月政化大行修葺學宮作新士類以憂去

張奇字頭口至元戊寅為永新州同性廉介恬靜不矜名譽秩滿去一肩行李如初來時

按舊傳作張頭口又尚集作張奇字頭口

陳質字尚古吳興人至元中為永新州學正積學宏深誨人始終不倦言動舉止皆循循矩矱學者奉為儀型

李春字孟元桂陽人至正元年知永新州治崇大體首先風化立譚烈婦祠親往祭之人心多所激勵公餘力學不倦有循吏風

按又尚集李春字元陽

趙大訥字默之東陽人至正初知永新州鋤豪剔蠹不數月百廢興舉增修廟學以作士氣

陳汴字岫雲至正初為永新州判清廉敏決崇儒術訟至立辨政績著聞遷守邠州

曹裕字德宏吳人貢士至正二年為永新州學正經史博通為文高古與諸生講授必先究體用之原次及文藝士自是知崇尚實學

諭立字中道至正間為永新州學正倡明正學廸士有方
凡由其門者多講究程朱之傳超然利祿外以上永新志

明

田盛字秀實吳元年甲辰任永新知州廉介有智畧時民

經兵燹逃避鮮復故居盛至多方拊循與守禦千戶俞

茂同心協濟學校頽圯重建殿廡門堂規制大備併置

祭器以崇祀典民復故居士習舊業聿成新治泰安志

烏斯道字已任鄞縣人洪武九年令永新廉靜有守民不

忍欺工文章邑士多從受經豫章書

於仲寬字濟猛黃巖人洪武間知永新南鄉龍氏聚寇為

亂千戶所官幸捕盜為利欲盡屠之仲寬力止躬率鄉

兵執盜魁治之寇平南鄉人感甚生子多以於姓為名

林志

按永新志載署知縣柯暹政績已見吉水縣名宦茲

不重錄

賀守約永新人洪武初為本學教諭課諸生必語以希賢

之要邑人士多傾心嚮之

鄧經會稽人貢士永樂四年任永新訓導操行端謹學問

該洽詩古文重一時學士解縉方伯李正咸加敬禮

陳元韜字用晦臨海人正統二年令永新撫字勤勞政令

嚴肅豪橫惕息士民樂業境內翕然稱治

按舊傳作陳員韜永新秩官志作陳元韜

施得中字立而奉化人正統間任永新主簿苦灘石艱運時微員皆得以事上聞得中奏請折輸民皆感之

徐輔字良弼崇德人景泰三年為永新教諭持已誨人以正誼明道為本善詩古文立言皆有根柢

薛驥字元德華亭人天順間知永新廉明公恕安貧扶弱民之豪強者皆感化理屈者不敢飾詞訟公廨以上永新志

李愷字仲康江陵人成化間知永新縣有梅花崗民梗化不供賦役愷單騎至崗諭以利害擇數百人詣縣克者

吏義官人皆感服擢吉安同知

湖廣通志

馬崑字克昌平湖人成化間進士令永新興利剔弊政先大體不苛刻不沽名事無大小必曲盡人情尋陞監察

御史

按又尚集作馬崑

曹謙姑蘇人成化間永新教諭課諸生授以經史言詩必本性情論文必衷理道嘗纂修邑志徵文考獻搜羅不留餘力

梅春字景魁應山人成化間永新縣丞誠心愛民每訟於縣反復不能決者春為之分割無不平情

宋佳字子美鄞縣人貢士宏治間永新訓導博通典籍師範端嚴造就後學誘掖不倦後擢太學博士

謝表字正邦忠州人宏治進士知永新勵精政治不畏強禦時邑義山之南豪室恃險負固不供賦役表伐山開

道執豪室就法宣布德化自是皆爭輸恐後以上永新志

柯相字元卿貴池人正德丁丑進士知永新值宸濠反王

守仁舉義討叛相集兵三千隸守仁而身居守事平守

仁叙功相辭不受江南通志

胡偉字邦奇京山人嘉靖元年知永新興學勸農儲粟賑

饑百廢咸舉邑歲賦苦虛賠民以艱輸多流亡偉疏奏

量田更籍均其賦役命下豪右咸稱不便上官多沮其

議偉力持之遂定計分都制籍因賦著役不浹歲告成

轉徙者復業安志

陸粲字浚明長洲人進士嘉靖癸巳以給事中謫永新令

政治嚴明吏肅民畏有奸黨十數輩螫害良善廉其人

實之法時寇煽諸境邑不逞朋起粲盡擒殲之尤厚學

校禮耆老倡鄉約民至今稱之安志

沈珠字汝淵揚州人嘉靖間令永新正直自持治尚寬厚

每決一訟杖一人羣服其公而愛其恕擢國子監丞

趙錫字爾極蘭谿人嘉靖間永新訓導性端方矜氣節教

士必先義利之辨嘗曰學問人品關頭必先看破一利

字根基方堅固學者以為名言

陶益字謙受新會人嘉靖間永新訓導風度醇雅操履清

潔講學宗實踐與諸生發明陳獻章之學一洗當時講

良知流弊

龔錫爵字汝修嘉定人萬曆進士為永新令首葺學宮凡

城堞廩庫以及忠孝節義諸祠次第修治政暇與巴士大夫纂修縣志迄今遺事可考皆錫爵之力以上永新志

余懋衡號少原婺源人萬曆進士知永新初邑學遷建西南隅羣稱不善乃捐俸復創於治東故址又創明新書院講求實用置田資師儒供膳建崇閣於浮玉洲屹然為中流砥柱立官解之法以甦民困大吏下其法於諸郡江省之有官解自衡始通志

陳三謨字汝明仁和人嘉靖進士知永新仁廉著聲邑有大盜捕得之殲其巨魁聽訟剖曲直聽其自平行藍田勸導民為善置社學以教邑之子弟倣朱子崇安遺制積穀貸貧民徭役適均催科不擾邑人立石志之

薛敷教號純臺武進人萬曆進士知永新持身廉潔衣食如寒士有持金進獻者亟揮去之若浼已然邑有橋關權稅條陳奏請罷之尤加意造士童子試卷手加批評環擁弗拒折獄刑罰不施曲直分割如神邑人呼為薛青天是時主簿朱敏政佐治廉明亦有小青天之號

陳三省號一吾餘姚人貢士萬曆初知永新清慎勤敏門無私謁每昧爽視事一日黎明過民家望見炊煙出即駐車慰勞曰汝能以朝氣治家事家將興矣夜巡至三鼓聞書聲紡績聲皆加獎勵其赤貧者周恤之羣相感勸無敢逸豫者體恤民隱案無留牘尤樂育人材士民相親如依慈母

吉安府志 卷三十一
陳圭號玉海建安人進士萬厯間知永新禮士愛民一本
誠心蒞政設施以息事寧人為本

按永新萬厯間名宦莊祖誥已見廬陵志

周夢尹號真維上虞人進士萬厯間令永新以興學造士
為先務度縣治形勝於城東建文塔明敏果決折獄能
以片語得民情偽

沈維堡號心南金壇人進士萬厯間為永新令為治廉明
課士以敦本善俗為勸勉嘗曰士為四民之首士習端
則民俗化諸生課藝手自評甲乙自始至終無稍懈

永新志

管正傳號德園蘇州人崇禎進士令永新悉心問民疾苦

力為罷革禁竿牘絕苞苴尤折節下士手自課程多所

成就至設彙封定官造歸條編毀淫祠至今猶守之

志安

閻及申號園客進士崇禎丙子任永新令丁丑楚寇圍城
及申安撫士民晝夜登陴固守調鄉兵四面擊之乘賊
敵鄉兵開城夾攻賊大敗去四境以寧尤好作養人才

敦尚氣節

永新志

黃受封號建侯永定衛人拔貢生崇禎癸未令永新時楚
寇破湖南游兵四出受封設法捍禦適賊兵入境號十
萬受封誓以死守會賊為左帥所逼遁去受封提兵與
皖虔諸將入楚恢復長沙衡州二郡還永新值廬陵安
福諸縣土孽為亂陰相煽惑聞受封還永新畏不敢發

以憂去土孽復起知縣冉世維一舉撲滅永新志

國朝

黎士宏字愧會長汀人貢士順治甲午令永新下車即盡除苛政與民休息慎刑罰伸冤抑薄賦息訟抑叛弭盜治甫暮月人心翕然從風興修文廟優禮司鐸每月課士拔其尤者厚以膏火清屯田設為附甲帶徵之法察坊糧為民害散編入里政暇為詩文皆有根柢以卓異擢去邑人創講堂刻石志之

盧傳字爾昌崇安人康熙初為永新丞邑屯有糧無田軍不能輸官為賠墊傳奉檄徵屯因悉其弊亟請清查民田時屯糧歸縣隨民糧帶徵不兩月劃然一清不累軍

亦不累官皆傳之力

何屬乾亨不息廣昌人康熙間永新訓導時乙卯寇變後倉廩初復學宮荒蕪乾捐貲倡修正殿兩廡增建啟聖祠復葺尊經閣集諸生講學建復譚貞烈祠著又尚集表揚永新名宦鄉賢事實興學造士闡發幽光以上永新志

張士琦號韋齋蘇州人副貢康熙間知永新減耗除苛為

民除積世之患擒大憝建議設兵於西部之阻其利可百世尤好獎士類開秋山書院選邑俊秀肄業其中延臨川李紱主教事尋以發官粟賑貸民貧者不得償被劾落職士琦素廉介無力賠補民欠羈留不得行士民感憤設櫃義助始脫然歸參穆堂集

張遇字予邁南城人貢士康熙間永新教諭課諸生治經義教以古學文藝一遵先正時知縣張士琦開秋山書院所得才俊皆遇平日所造就之士

黃述灝字次梁南昌人康熙間永新教諭課士有方凡所啓迪遠取近譬諸生聽之疊疊一時知名士皆出其門灝才識練達當事疑難事輒就商確指陳切中機要無事請託人亦不敢干以私邑人祀之

史榮浙江會稽人康熙間任永新典史勤於捕盜好文重儒暇與邑士大夫分韻唱和翛然塵表

蔡學灝字伯程虞城人貢士雍正五年為永新令先是胥吏冗法積欠錢糧至十餘年未清灝至痛懲蠹弊自是

官不苦於催科民無逋賦治邑三年四境大治以擢去

以上永新志

徐可是字惕非南昌人歲貢雍正三年任永新訓導道範端嚴誨諸生必盡其誠講學以敦行為先舉朱子白鹿洞規條反復為諸生指示教諭涂圖學富才敏可是素

重之圖沒出已俸助其柩歸里

永新志

朱懷棻字易林高唐州人廩生雍正間授永新令時鄉城多刁健之徒交通書吏誑詞興訟懷棻閱詞得其情並寘於法士有能詩文者懷棻每課必獎賞嘉嘆並教以研求經史

陸調元吳縣人監生雍正間為永新縣丞崇尚文雅耻言

貨利值日止一書一隸遇事不留餘力暇則彈琴詠歌
聲出金石以憂去邑人祖餞僉曰在官署可設羅臨去
其門如市

黎芝字友蘭夾江人貢士雍正間知永新治尚寬和曲盡
人情每訟必平心和氣聽之即童孺皆可伸訴曲直立
剖莫能行其詐征收錢漕力行滾單輸納無追呼之擾

以上永
新志

永寧縣名宦

明

蕭文斌 潘瑾 蔡然 趙汝宜 費廣
周倫 馬鈺 謝圭 方坤 陶膺

吳邦祐 陸時雍 梁爵 吳鉞 李鳳
王鑛 張烈 朱昌 童世芳 李養棟
黃一楨 張應徵 徐繼芳 張紀 伍鳳章
丁學植 陸起龍 鍾鳴時 謝君賜

國朝

王化行 鄒惟瓚 齊贊宸 閔士樟 趙國臣
倪德基 莊梯雲 楊顯宗 涂國屏 陳欲達
朱家印 張洽 戴振河 李允芳 嚴順
任倫備 熊學麟 馮元韶 王緒俊

明

蕭文斌洪武初知永寧時兵燹後人民離散城郭荒蕪文

斌悉心招集拊循有方不數月鄉城完聚卜基縣治西
建文廟興學造士律身廉謹邑人崇祀之參永寧志

按蕭文斌里居出身職官失載後傳凡無里居者皆

同

潘瑾建文三年為永寧典史有操守富人接見必勸其濟
貧行善事常捐已貲以活貧人

按舊傳作洪武三十四年今據正史編年更正

蔡然永樂初任永寧典史疏通水利資民灌溉自奉澹泊
不枉一事不受一錢陞廬陵知縣邑人祀之

趙汝宜字孚先閩縣人景泰間任永寧教諭人有以外事
干謁者必正色拒之持已誨人必以正道多士皆相矜

式

費廣字孟博合州人進士天順間知永寧振興學校激揚
士類廉以守已惠以澤民邑人以循吏稱

周倫字序昌錢塘人成化間任永寧教諭以正律已以道
淑人多士日請益其門不敢稍干以私以上永寧志

馬鉦四川人宏治間知永寧廉幹通敏首禁師巫毀淫祠
鼎新學宮日聚諸生督訓之百廢悉舉邑稱大治通志

謝圭會稽人宏治間知永寧慈祥愷悌愛民如子修學校
課諸生建縣廳築陂志

方坤號舊山餘杭人進士二德間知永寧時湖廣鹽箕山
流賊分布劫掠鄉村城市坤靜以撫之分兵防守賊知

有備引去先是永寧皆土城坤請於上官易建磚城規畫曲盡永資保障

陶膺浙江人正德間為永寧令寬厚愛民奏減加派錢糧凡事有不便於民者悉力除之興學校勸農桑士民均枝其澤

吳邦祐號少溪歙縣人貢士嘉靖間知永寧廉潔明敏訟至立剖民數十里赴訊者皆朝至暮返胥吏畏之如神會山寇劫掠邦祐率兵親勦生擒甚眾罪不赦者寘於法餘從未減

陸時雍字幼淳歸安人進士嘉靖間知永寧以清慎勤自勵修文廟備祭器優禮司鐸暇則與諸生講晰經義均徭役省刑罰勸農桑化行俗美囹圄空虛

梁爵字仲修麗水人貢士嘉靖甲辰令永寧修廢補敝尤優禮儒士以教化為急務士民為立循良碑

吳鉞廣東人嘉靖間任永寧教諭坦易重厚博極羣書教諸生必先道義邑人重其學行共祀之

按永寧職官作吳越

李鳳字廷儀仁和人嘉靖間任永寧教諭以身為教引掖後進訓迪有方長於古文及門士爭效之必引周子之言曰道德本也文藝末也邑諸生造就多有根柢以上永寧志

王鑛字公範嘉靖間任永寧教諭教諸生習經史講學會

文無間寒暑性孝友內外雍睦邑人士皆敬禮之參縣志

張烈甌寧人嘉靖間任永寧訓導純雅淵博一言一動雖造次皆有規矩課士嚶嚶不倦親其道範無不肅然起敬陞岳州通判

朱昌黃巖人嘉靖壬寅任永寧典史時賊寇彭矮子率眾三百人出劫六堡昌設計擒之四境以寧嘗疏築陂塘利民甚溥

童世芳臨安人嘉靖間任永寧典史洗心奉職廉能素著時城垣圯寇變不常童捐俸倡修民賴保障尋以憂去李養棟貴陽人貢士隆慶二年知永寧愷悌宜民催科有式輸納稱便一切剔弊釐奸不少寬假尤加意學校置學田以給貧士

學田以給貧士

黃一楨同安人貢士萬厯間知永寧才識精敏誠心愛民更振興學校拔其尤者肄業學宮給膏火獎拔優卷文風因以大振以左遷去以上永寧志

張應徵號懷泉南克人貢士萬厯間知永寧果斷公平鋤強扶弱庭無滯訟催科定四限民甚稱便興學育士捐郵貧窶肄業生張夢桂赤貧未婚應徵愛其才為之擇配廨署敝陋捐俸修葺闢險途創郵亭便民之事皆力為之後調任去邑人建亭勒石參順治府志

徐繼芳建安人萬厯間為永寧典史勤於供職盜息民安時知縣張應徵勵精庶務皆賴芳贊襄之力

張紀號浣澗華陽人貢士萬厯間知永寧禮士撫民實心
行政積社倉以備荒歉修七溪嶺以利行人與前任張
應徵後先媲美邑人共勒石於亭顏曰西蜀二張
伍鳳章晉江人萬厯間任永寧教諭與諸生講學誠意懇
切課藝必以先正為程式諸生感化皆勸勉向學
丁學植福建人萬厯間任永寧教諭言動皆有禮法縣庭
非公不至諸生有被牽累者力為昭雪尤加意寒士每
周恤之以擢去
陸起龍上海人貢士崇禎間為永寧令相舊學宮地形非
宜捐俸為倡改建城東廣學會造就人才文風大振邑
人建祠祀之

鍾鳴時崇禎間任永寧訓導日與諸生講學課業布袍脫
粟自奉晏如會知縣陸起龍遷學於城東鳴時力勸其
事邑人並建祠祀之

謝君賜四川人崇禎間令永寧性剛正一介不取愛民如
子選邑中俊秀於學宮造就之既去士民歌思不忘
以上

永寧志

國朝

王化行山東人貢士順治丁亥知永寧下車問民疾苦以
興化致治為己任寬刑罰省徭役禮士愛民咸依之如
慈母戊子寇變守死不去竟罹於難

鄒惟瓚南昌人順治間任永寧訓導時寇變初平士鮮向

學惟瓚集諸生講貫察其貧者力周之扶持名教振興
儒林

齊贊宸直隸人進士順治癸巳知永寧時山寇未靖人民
逃散城市荒涼贊宸拊循流亡驅除寇盜民始復故居
四境安堵

閔士樟五臺人貢生順治己亥知永寧興學造士誠求保
民自戊子寇變後學宮鞠為茂草士樟捐俸倡建優禮
師儒崇尚實學時田多侵隱租稅未均士樟履畝親丈
徵收錢糧不假胥役農安稼穡野無追呼

趙國臣揚州人順治間任永寧典史循分供職禮賢敬士
公餘惟彈琴賦詩邑人欽其雅致

倪德基江南人貢生康熙初知永寧冰清自矢釐奸剔蠹
條列利弊刊布鄉城一年吏畏民懷以呈誤去

莊梯雲番禺人貢生康熙初知永寧政寬刑簡與民休息
造就人士於貧寒尤加優恤治邑九年風醇俗美解署
傾圮重建一新守道施閭章為文記其事

楊顯宗保寧人貢生康熙辛亥知永寧興學育才重建明
倫堂與諸生講學乙卯逆將韓大任陷府城分兵畧地
寇賊蜂起顯宗集鄉兵戰守衣不解帶曉夜登城捍禦
卒罹於難

徐國屏南昌人康熙間任永寧訓導課諸生講明經義尚
論古人以忠孝節義為取法值甲寅寇變城陷肅衣冠

北面再拜詣聖廟展禮畢祀之

按舊傳訓導涂國屏蒞任年分失載今據寇變死忠時事補正

陳欲達鹽城人貢生康熙庚申知永寧時縣城初恢復欲達下車招集流移加意撫字開墾荒蕪憐貧恤苦息奸弭訟重新學宮加惠儒林復倡修縣志俾文獻有徵在任三年政通人和邑稱大治

朱家印樂安人歲貢康熙庚申任永寧訓導日課諸生潛心經學抑奔競礪廉隅多士悅服

張洽字仲和膠州人進士康熙戊辰知永寧杜絕私交門無干謁邑舊有陋規洽條列禁革勒石以志運漕旗丁

往往以逃軍絕戶攀累良民洽立陳上官清軍戶民戶按籍開除尤加意學校造就諸生三年以治行交薦

戴振河號開亭德清人進士康熙甲戌知永寧性喜吟咏為小圃植竹公餘集邑中風雅士倡和其中七溪有峻嶺行旅艱難振河鑿石成坦道建茶菴於上人稱曰戴公嶺

李允芳廣昌人貢士康熙間任永寧教諭課諸生以明體達用優禮多士誠心樂育始終如一

嚴順浙江人康熙間任永寧典史潔已愛人淡泊自甘邑中貧苦常出已貲周恤罪人可末減者力請於縣出之獄邑人稱其多隱德

任倫備號金壇河內人進士康熙己卯知永寧接士對民
譏意懇摯折獄敏捷各得其平居官儉樸如寒士歷任
十年士服其教民懷其惠

熊學麟南昌人拔貢生康熙癸亥任永寧教諭家本世族
性甘淡泊嘗曰儉則無求日與諸生講貫以砥礪廉隅
為要文教振興士心敬服

馮元韶號舜年祥符人康熙間任永寧升鄉巡檢持已廉
介舊規盡為革除嚴束吏役勤於巡緝盜賊遠徙

王緒俊號秀萬新建人拔貢生雍正乙卯任永寧教諭課
士崇尚實學以經史為根柢暇輒杜門著書非公不至

縣庭

以上永寧志

按名宦傳均倣通志編次各縣名宦本傳惟泰和吉
水二縣編次相符其餘由縣令而佐雜由佐雜而儒
學一名宦志中朝代前後互見今畫一更正又各傳
中見通志及豫章書者多簡潔隱括無俟斟酌其餘
皆據本傳事實詳加修飾更有傳見通志及豫章書
而本志名宦秩官並軼其名者有名宦傳有其人而
秩官志轉軼者有本傳姓名與秩官互異者有其人
事實見之各志而本傳中失載者甚至其人見於史
鑑而本傳與史鑑徑庭者皆為增訂又按舊府志於
武職未立傳即縣志亦惟廬陵龍泉萬安三縣各附
見數人耳今搜次附名宦傳後

武勲附

吉安自明以來立營止千戶百戶所萬戶則暫立耳至國朝立五營有叅將一都司四武備整肅今攷武勲宋元各得一人明十人國朝十人照朝代編次立傳

宋

程層益子宣附

元

馬致遠

明

俞茂梁學王業陳瑄張興

蔣興劉淵王莊王應鵬趙雲

國朝

齊登科康共鄧雄黃成章李明

陳平顏斌王師槐解鳴鹿李顯祖

宋

程層益字明秀歙縣人宋理宗淳祐時襲廕有大勲授總軍萬戶鎮臨江移守永豐聖嶺營伍肅然子宣字翔雲襲廕以他故謫百戶晉右武將軍戍龍泉宋亡遂失官家永豐之永寧洲

按縣志聖嶺屯兵僅載百戶程宣領兵屯守後罷兵屯遂卜居永豐而其父程層益實先以萬戶移屯於

此遺漏失載今據羅念菴集補立斯傳

元

馬致遠字合穆其先世自西域徙京師以廕補官授廬陵
井岡巡檢至正壬辰江西盜賊蜂起奉府檄捕南嶺備
烏東致遠招集吉屬諸鄉鎮與賊鏖戰斬捕甚多上功
幕府監郡納速兒丁多其能辟安成判官授廬陵監縣
擢烏東萬戶府事癸巳九月賊自永新踰嶺掠玉山火
淡江將近安塘致遠率眾追擊破走之乙未破袁寇於
安福丙申復破賊分黨於永豐之羅興塘賊躍馬奮擊
戟抵胄致遠斬以徇明日整兵復出生擒賊帥周昇又
明日官軍四集焚其營巢拔良民之陷賊者慰撫之民

相率立生祠於安塘採周震記補

明

俞茂吳元年甲辰為永新千戶所翦除寇盜四境以寧尤
崇尚文教與知州田盛重建學宮振興儒林立法嚴肅
軍戶有欺凌百姓者立寘於法邑人為之歌曰田文俞

武皆我父母參田盛本傳

梁學濟南人永樂間襲永新守禦百戶膽畧過人鎮泰和
白羊坳流賊犯境學與賊三戰賊三北獲賊平先楊法
等斬首以徇尋賊益眾學兵少力盡矢窮乃大呼罵賊
其兄公鼎僕鼎付三人被殺事聞贈官遊擊將軍廟祀
死所子霞襲陞一級縣志

王業字時泰興化人宣德間以父祥廕授吉安所副千戶
乙卯永豐大盤山寇曾子良肆掠業生擒之以功陞正
千戶正統戊辰討平福建巨寇鄧茂七已巳浙寇嘯聚

丁公崖業往征失援陷陣手刃數十人死之廬陵志

陳瑄世職斌之子景泰六年授龍泉百戶成化丁未石門

武平賊大掠龍泉瑄獨任守城率衛所兵力戰而死百

姓哀之為立廟祀銀山塔下龍泉志

張興宣德間以廕授吉安所百戶佐王業征撫州寇以功

陞副千戶正統戊辰復與王業征鄧茂七斬賊無算陞

正千戶興循循雅飭若儒者然臨陣則驍勇莫敵名重

一時

蔣興高郵州人吉安所百戶與張興同時佐王業剿寇斬

俘甚衆陞正千戶有膽畧每遇敵自期以死報國所至

輒有功

劉淵吉安所百戶與張興等同佐王業討平諸寇勇敢嘗

先並著功勞陞本所副千戶

王莊字本端王業孫成化間廕襲吉安所正千戶剛果練

達屢著戰功丙午平萬安賊湯存文丁未殲永豐賊金

耀宏治戊申生擒梅花洞寇周天鑾已酉襲滅南贛巨

賊賴斑穴自是郡中晏然庚午姚源洞寇起從都御史

陳金討之出師豫章莊賦詩自勵戰多斬獲一僉事失

利指揮徐麟等先遁莊罵曰朝廷養軍士用在今日顧

乃爾耶戒所部直前奮力死戰賊勢將却援兵不至力
殫衆潰死之越三日得其屍奮怒如生手猶作彎弓狀
事聞官其子孫指揮俱廬陵志

按王業與張興等廬陵舊傳本末未清今分別次第
五人各為一傳

王應鵬吉安所指揮僉事嘉靖辛酉程鄉賊掠泰和應鵬
與百戶陳策領兵禦賊俱戰死事聞立祠祀之陳策無

嗣加陞應鵬弟指揮同知豫章書

趙雲武昌人崇禎間湖南獻賊犯境雲自虔州撫標奉檄
助守吉安賊未至城中軍民移帑出城雲曰似此朝廷
用城池守官何為戒勿擾自登南城捍禦適東門民家

失火雲曰此奸細作為也麾家丁往救身率士卒守城
賊知有備不敢發詰日賊馳八騎由西門突入雲方披
甲守南門聞變持兩戟獨往鬪賊八騎賊并力殺之死
後目光如生戟在握不可拔事平雲養子趙忠扶櫬歸

武昌廬陵志

國朝

齊登科順治三年丙戌授龍泉營守備九年壬辰紅巾賊

劉金一作京蓋遇時王打鐵等陷龍泉登科率官兵隨叅

將羅應培等勤平之龍泉志

康共號明我蘇州人順治乙亥授萬安營守備善左右射
勇畧過人訓練有法為人坦白不設城府輕貨財重然

言... 卷三十一
諾禮師儒多得人心歷任袁臨副將邑人立祠祀之
鄧雄號虎山大同人康熙戊申任萬安營守備愛民重士
軍法嚴峻兵有侵民園蔬者犯雖小必寘於法操練士
卒以身先之兵馬糧餉一無所私每暇延邑中知名士
諮訪形勝利害乙卯賊將韓大任陷郡城雄往援山寇
竊發丙辰萬安失守雄馳歸奮力恢復叙功陞安慶遊
擊

黃成章號簡齋泉州人康熙丙辰萬龍山寇陷萬安成章
奉都撫檄提師壓境與萬安守備鄧雄會兵恢復城池
因駐師萬安多方招撫流亡歸集戊午以成章為萬安
遊擊癸亥裁缺除均州軍正士民立碑亭以志德感萬俱

安志

按萬安武職志載黃成章於康熙十七年由海上投
誠任萬安遊擊攷本傳成章提師恢復萬安在康熙
十五年至十七年萬安初設遊擊以成章任之二十
二年缺裁陞均州去是成章由海上投誠在康熙初
年作十七年者誤

李明字明宇涓川人康熙十三年甲寅以征閩寇功授吉
安中營守備時寇盜充斥乙卯廬吉泰三縣賊眾負隅
蹂躪據保明率精兵及鄉勇直入賊巢斬首數百級餘
賊披靡棄所掠男婦去明乘勝進勦瀘源權擔諸砦戒
勿輕殺賊破獲男婦數千曉諭各識認領回諸砦既平

引兵鎮泰和乙卯滇賊將韓大任陷郡城數攻不下知府龔其裕自瑞州引兵至駐兵螺子山合謀明年丙辰明單騎引步軍數百人迎恩橋夾攻殺賊數千賊氣阻黃夜踰城遁走郡城乃復戊午山寇進逼郡城明與知府蔣維藩招撫之辛酉擢明沅州遊擊明已卒於任廬陵志

按縣志云李明先世由吉州遷洛陽今仍家廬陵其子遇春達春俱入太學知府蔣維藩副將色勒為營宅兆於張家渡六祖菴右陽山

陳平字等奇海澄人始從遵義侯討海寇歷功陞左都督屯萬安田會康熙間三藩叛四方騷動萬安崔符亦聚

黨數千殺官吏據城郭以應平率官兵攻萬安城克之斬渠首以獻時撫建廣逼近閩浙吉安為長沙肩背官軍在信州饋糧不繼制府以信餉屬平平悉力挽輸往返無疎虞軍帥調平隨征湖南至袁州而吉安城陷乃以平為分宜留守彈壓吉賊又隨征龍泉賊斬首無算晉榮祿大夫總鎮南瑞六州軍事通志

顏斌字輔臣曲阜人復聖裔康熙庚申授龍泉營遊擊初隨豫王取維揚復從貝勒入閩守清漳移駐皖城援勦江西屢立戰功授龍泉任率從事金從現馬守志褚名臣呂登科等重建關帝廟整飭營伍惠愛百姓邑人李士琪為文紀其事龍泉志

王師槐四川人武進士雍正五年丁未任吉安營叅將善騎射勇力絕倫喜讀書重文學每與郡紳士尚論古人亶亶不倦或叩以孫吳之書師槐曰千古兵法之祖不外一左傳孫吳皆在範圍中也郡人皆以名將目之師槐整飭營行每列一陣親躍馬引導糧餉散給公平御下恩威並濟時論方之羊叔子

解鳴鹿直隸人乾隆八年癸亥任吉安營叅將時兵丁縱肆橫行市廛欺凌百姓見儒士輒加侮慢有不平赴訴者將弁為之袒護鳴鹿至約束有方廉得無狀者立寘於法營伍肅然每晝操練士卒夜則巡查街道無少休息

李顯祖直隸人乾隆間任永新營都司軍紀嚴明兵民相安為人正直以忠孝自勗後陞遊擊隨征大金川陣亡

以上
新增

--	--	--	--

入五里山
 谷口有古碑
 曰漢碑
 碑上刻有漢字
 曰漢碑
 碑上刻有漢字
 曰漢碑



